



Quotidiana Christiani Militis Tessera

Stanyhurst, Guillaume

Coloniæ Agrippinæ, 1682

5. Dies Januarii. Primas apud nos curas, quæ prima habentur, obtineant.
Eucher. Epist. Parane.

Nutzungsbedingungen

[urn:nbn:de:hbz:466:1-55659](https://nbn-resolving.org/urn:nbn:de:hbz:466:1-55659)

5. DIES JANUARI.

Primas apud nos curas, quæ prima habentur, obtineant. *Eucher. Epist. Parane.*

Primum I.
quæren-
dum cæ-
lum.

Non satis est velle in vitæ progressu servare ordinem, sed in ipso ordine servandus est ordo, ut serveris per ordinem. Quapropter ne in ordine servando actum agas, is tibi sit norma agendi, qui est purissimus actus, Deus. Statim ubi cæpit esse tempus, cæpit, per quem sunt tempora, operari Deus. Quæris, quod fuit ipsi initium operis? Hoc tibi suggeret primum caput Genesis, & ex eo intelliges seriem observandi ordinis. (a) *In principio creavit Deus cælum & terram.* En ordinem. Primò cælum, dein creavit terram. Totum nostrum vivere, nil est, nisi aliquid quærere. Quæris, quid sit tibi primò quærendum? Respondeat qui te quærit: (b) *Quærite primum regnum Dei.* Cælum comparare, & cælestia curare, sit tibi cura non tantùm prima, sed tota. Illud igitur sit tibi quæsitu primum, quod est inventu summum. Creatus est tibi animus non tantùm è cælo, sed propter cælum. Periculum igitur, imo perniciem tibi creas, si aliud impensius ambis præ eo, propter quod es creatus.

II. Quælibet animi actio, est quædam veluti creatio. Dum quippe animus agit, aliquid esse incipit, quod

(a) *Gen. 1. 2.* (b) *Luc. 12. 13.*

quod non fuit. Memoria dum quid recolit; Intellectus dum cogitat; voluntas dum amat, aliquid creat. In principio hujus anni, secuturi mensis, futuræ hebdomadis, cujuscunque diei, illud quod creas, sit primum ordine, quod Deo fuit primum in creando, tempore, cœlum, id est, Regnum Dei. Porro Regnum Dei, est ipse Deus, hic regnans in nobis per gratiam, postea per gloriam. Debet ergo illud quæri ut finis, quia quod quærat ad nostrum bonum, nihil est supra, vel ultrà. Propter hoc ergo unum facienda sunt omnia, quæcunque facimus. Si quid autem quæras, quod est sub cœlo, quærendum est propter cœlum. Si alia præ hoc desideres, illa & perdes tu, & perdent te. Quid sentires de homine, qui, quia contractior est calceus quàm pes, partem abscinderet pedis, ut calceo respondeat pes? Insanires, nisi insanum censeret. Est enim calceus propter pedem, non pes propter calceum. Par tua est vesania mentis, insania cordis, dum perversus inverso ordine præfers terram cœlo, tempus æternitati, corpus animæ, cænum auro.

III. Sic autem Regnum Dei præ omnibus quæras, ut præ illo omnia negligas. Terra, cum sit infra te, est calcanda, non adoranda. Indignum est, animal dignissimum, rectum, & ad cœlum erectum curvari ad terram. Ideò statum sublimem, præter cæteras animantes accepimus, ut non revolvamur deorsum, nec hunc cœlestem vultum projiciamus ad terram, sed oculos eò dirigamus, quò illos naturæ suæ conditio, direxit, nihilque aliud adoremus nisi solius opificis nostri Numen. Venisti

Januar.

Tessera.

13

in mundum, non ut esses de mundo, sed supra mundum, ut sic aliquando sis intra cœlum. Illum despice, hoc suscipe, ut te olim suscipiat. Et illud altè menti imprime, frustra sum, frustra hîc vivo, frustra omnia, dum hîc dego, ago, totoque cœlo aberro à cœlo, si quid studiosius quero, & impensius opto pro eo, quod est optabilium omnium optabilissimum, Cœlum. Procul à nobis illud pessimum pessimorum axioma: *Quæ supra nos, nihil ad nos.* Imo nihil magis est nostrum, quàm quod est supra nos. Tamen si angusto calle tenditur ad illa, quæ sunt sursum, pii Vatis calculo, dum ita canit:

Est iter angustum, quod ducit ad æthera sursum.

6. DIES JANUARI.

Qui se sibi Magistrum constituit, stulto se discipulum subdit. *Bern. Epist. 87. ad Ogeri.*

Opus est I.
Directore
in via perfectionis.

Quid refert scire, ut ordinem serves, ea esse eligenda primum, quæ dignitate sunt prima, si quæ illa sint, ignores? Ideò eligendus est Magister, sub cujus disciplinâ sis in viâ vitæ, non tantùm ab errore tutus, sed à metu erroris securus. Si nolis esse discipulus hominis, fies tibi ipsi magister erroris. (a) *Nulla ars sine tempore discitur, & absque præceptore. Ars artium sola sine*

Magistro

(a) *S. Nilus, lib. Asce.*